

per consensum partium subiectarum; à fumis equidem ascendentibus contingit motrices sensibilisque functiones perturbari; sensus equidem fit torpidus, difficilisque motus, malè denique imaginantur.

SIGNA. Difficilis fit motus, atque ab aliqua re se inuadi aut opprimi homo credit; aliquid enim suo insidere pectori putat, torpidusque fit in somno sensus, suffocationisque fit imaginatio, ita vt vocem edere non possit etiam si clamare laboret, aut saltem incerta malèque discreta editur vox, & aliquando quoque mugit vt flentes. Phantasia ita quoque offenditur, vt subinde spectrum seriò adesse existimet, vnde anxietas tandem etiam concurrat, clamandique desiderium enascitur, hincque sanguinem quasi ebullire contingit atque incallescere, sicque spiritibus attenuatis, meatibusque apertis, perrupto somno, repentè homo excitatur.

CAUSA. A crassa frigidaque pituita, necnon à sanguine crasso atque melancholico circa præcordia venasque pectoris existente oritur, vnde vapores crassi eructantur; quibus quotiescunque vapores multi crudi à crapula enati permiscentur, tunc dictis in locis partes diaphragmatis premuntur, necnon pulmonis, vnde impeditè homo respirat, seque suffocari putat; hinc vbi in fauces se insinuat, vox suppressi videtur. In cerebrum denique si transmittantur, sensum ipsamque mentem perturbant tristibus quibusdam spectris. Tales vapores aliquando etiam eructant hæmorrhoides mensisque suppressi in illis in quibus fluere consueuerunt. Nequaquam autem ab insultante fit vetula, vt multis persuasum est etiam hodie.

PROGNOSTICA. Incubo diæta vtens tenui vix molestatur, multis autem cruditatibus oneratis familiare est. Rarius quoque irruit in illos qui in lateri incumbunt. Hic affectus si frequentius diutiùsque concurrat, apoplexiam tandem minatur, aut epilepsiam, necnon maniam, sæpius melancholiam hypochondriacam, vertiginem, paralyfim, spasmum, neruorum distentionem,